



清閔閣遺稿卷一

雲林倪瓚元鎮父著

八世孫理梓

四言

至正十年十月廿三日余以事來荆溪重居寺
主邀余寓其寺之東院凡四閱月待遇如一
日余將歸迺命大覺懺除垢業使悉清淨乃
爲寫寺南山畫已因畫說偈

我行域中求理勝最遺其愛憎出乎内外去來作

夫豈有礙依桑或宿御風亦邁雲行水流遊戲自
乃幻巖居現於室內照曾中山歷歷不昧如波底月
光燭眈眈如鏡中燈是火非詒根塵未淨自相翳晦
耳目所移有若盲瞶心想之微蟻穴堤壞輾然一笑
了此幻界

義興異夢篇

辛卯之歲寅月壬戌我寢未興戶闔於室爰夢鬼物
黯淡慘慄或禽而角或獸而狘夔足駿奔豕形人立
往來離合飛搏跳擲紛攘千態怪技百出予茲泊然

抱冲守一廓如太虛雲歛無迹晨雞既鳴冠擲斯畢
涉庭而詠已化奚恤春風惟振亮月在席凋瘁何損
榮華匪益獨以圓悟境無順逆愚夫說夢轉墮迷惑
滔滔天下病者良極僕我大雄拯此羣溺

至正乙未素衣詩

素衣內自省也督輸官租羈繫憂憤思棄田廬
歛裳宵遁焉

素衣涅兮在彼公庭載傷迨隘中心怔營彼苛者虎
胡恤爾氓視氓如縱寧辟尤詬禮以自持省焉內

雖曰先業念母盪失守而不遷致此幽鬱身辱親始
孝達義屈蔚蔚荒塗行邁靡通雖雖鳴鳳世莫之逢
夕風淒薄曷其有旦吁嗟民生實罹百患先師遺訓
豈或敢忘簞瓢稱賢樂道無殃予獨何為悽其悲傷
空谷有芝窈窕且廓爰宅希靜菽水和樂載弋載釣
我心不忤安以致養寤寐忘憂修我初服息焉優游

徐良夫耕漁軒

鄧山之下其水舒舒林廬田圃君子攸居載耕載漁
爰讀我書唐虞緬邈愴矣其悲棲遲衡門聊得我娛
敬慎誠篤德罔三二四勿是事三益斯萃彼溺于利
我以吾義彼自暴棄我以仁智匪今之同惟古是嗜
虛邪消淫隱約斯世

題畫

義興之山維水瀾瀾載遊載咏操觚挾几聊樂一日
百歲奚俟

清閔閣遺稿卷二

雲林倪瓚元鎮父著

八世孫理梓

五言古詩

春日雲林齋居

池泉春漲深徑苔夕陰滿
諷咏紫霞篇馳情華陽館
晴嵐拂書幌飛花浮茗盃
階下松粉黃牕間雲氣暖
石梁蘿蔦垂翳翳行踪斷
非與世相違冥植人忘返

懷張外史

緬懷蕭間館乃在華陽天焚香坐幽谷濯纓向清泉
真靈浮空至樓觀與雲連彈琴明月下飄飄舞胎僊
雨中寄孟集

英英西山雲翳翳終日雨清池散園文空林絕行獲
野性夙所賦好懷誰共語燒香對長松相與成賓主

聽袁子方彈琴

蕙帳疑夕清高堂流月明芳琴發綺席列坐散煩纓
迴翔別鵠意縹緲孤鸞鳴一寫冰霜操掩抑寄餘情
贈天寧福上人

荆溪霜落後銅官日出初自擲頭上髮更理篋中書
上人從定起咏言方繞除邂逅發微咲幻身同太虛
十二月十七日過與之洛澗山居留宿忽大雪
作及明起視戶外巖岫如玉琢削竹樹壓倒
徑無行踪飄瞥竟日至暮尺餘因賦詩留別
世途縈荏苒歲宴不知歸密雪竹林夜挑燈共掩扉
蕭條塵慮淨諷咏玄言微遇此巖中賞心事悵多違
別張天民

鳴雁將北歸徘徊舊楸處江湖春水多欲去仍回顧

卷二
稻梁豈余謀，繒繳非所慮。猶爲氣機使，暄冷逐來去。
寥寥天宇寬，彼此同一寓。風萍無定踪，易散聊爲聚。
君看網中魚，在疚猶相煦。

泊芙蓉洲寄張鍊師

芙蓉猶滿渚，疎桐已殞霜。泊舟菰蒲中，吳山隱微陽。
因懷靜默士，竹林閔玄房。煮茗汲寒澗，燒丹生夜光。
憶與鄭郊輩，閒咏步修廊。時子有所適，顧瞻重徜徉。
庭下生苔蘚，牖間繙詩章。奕勢鄭老勝，酒榼郊生將。
雅歌雜詼諧，列坐飛羽觴。子歸日已晚，棗栗亦傾筐。

揮手輒謝別，暮宿荒城傍。遲明趨所期待，子鄭公堂。
晨往遂至昏，企望徒悵悵。乃嗟仙真馭，固非世所望。
惻惻理歸棹，泛泛秋浦長。還尋甫里陸，更醉山陰王。
素冠斯馳贈，喜知終未忘。余茲將遠適，旅泊猶彷徨。
微風動虛碧，初月照石梁。曠望對清景，賦詩託陳郎。
茯苓思同煮，夜雨共匡床。

蕭閒道館聽袁南宮彈琴是日風雨蕭然有感
而作

玉琴轉清亮，風雨更飄颻。疎桐蔭高館，朱槿耀芳條。

卷二
三
生物曷可遏撫事發長誼弱齡陪清讌擲髮想垂髫
相見日以老離居夢且遙秋江眇雲水去鶴影搖搖

送高太守之秦郵

秦漢置牧守猶古之侯伯封建而郡縣仁政固不易
漢宣知所本留意二千石慎哉高侯車願循古轍迹

蕭間館夜坐

隱几忽不寐竹露下泠泠清燈澹斜月薄帷張寒廳
躁煩息中動希靜無外聆宵然玄虛際詎知有身形
和吳寅夫對雨見懷

溽雲變陰晦零雨隨風濤的皪集蓮池飄飄灑蘭臯
朱絲緩瑤瑟綠錢生寶刀撫事增慨慷端居倦遊遨
處世每慙柳懷人徒詠陶脆質愛靈藥閒情宜弱豪
次陶蓬韻送葉叅謀歸金華

手把玉芙蓉青天騎白龍出入人間世飛鴻踏雪踪
瑤草粲可拾羣峰森玉立璧月掛天南離離星斗濕
君昔在山時玉韞山有輝因同白雲出更與白雲歸
白雲無定處豈只山中住河漢共縈紆經天復東注
金華牧羊人游戲不生嗔笑拂巖前石行看海底塵

手調白羽箭陋彼磨銅硯一語不投機歸歟寧再見
士豈始隗乎全趙匪相如項王疑亞父竟爾龍為魚
擾擾何時已百年聊寄耳良也報仇歸言從赤松子
去山今幾年還山大學仙天台司馬宅雲氣近相連

偶成

積雨不為休蕭條使人愁哀吟四壁靜病卧百虫秋
開門望原野江湖漭交流誰能載美酒為我散煩憂

次曹都水韻二首

杜陵布衣翁許身稷禹行賦詩原正始感事多哀傷

煌煌萬丈焰岌岌數仞墻君能仰餘輝假日尚升堂
弛擔息荒途日暮將安之挾彈狂遊子閉雞輕薄兒
衆方巴人唱獨歌陽春詩天門何嚴邃綠窓隱翠愚

贈錢羽士

鍊師好神仙望拜金母臺疊疊應玄運煌煌秀靈芝
天風流瓊響夕露調玉盃鳳棲池上竹雨添堦下苔
時見兩青鳥碧海傳書來感此忽自笑飄然遺氛埃

送甘允北上

翔鴻縱高姿流水去不息枉道別友生揚舲望京國

婉變前途憇蕭條餘景匿神京衣冠會左右金陽宅
驅馬流星繁垂軒春霧集嘉子玉質朗早通金閨籍
行逢明主顧入補詞臣職束帶向晨趨陪讌終日昊
芳年易爲晚所願崇令德英英白雲飛渺渺青山隔
秋風應節起萬里思親客遲子返舊居銜盃數相覲
雙寺精舍新秋追和戎昱長安秋夕

秋暑晚差涼茗餘眠獨早清風振庭柯寒蛩吟露草
晨興面流水西望吳門道不知人事劇但見青山好

寄段吉甫

昔者段干木踰垣避其君冥翳巖穴間清風扇炎氛
德綿百世下吉甫賢且文神鸞養竒采芳芷結幽芬
回視當世士雞鷲正紛紜區區事夸效子猷介不羣
舍瑟作而嘆此道誰復云

送章鍊師并寄鄭有道

良覲忽云阻桐花今亦繁落日滿洲渚揚舫念孤騫
因懷息機叟蘊真從灌園晨掃石上雲佇子接清言
余友玄中真師在錫之東郭門立靜舍名玄文
館幽潔敞朗可以間處至順壬申歲六月余

寓是兼旬謝絕塵事游心澹泊清晨櫛沐竟
終日與古書古人相對形忘術接悠然自得
也且西神山下有泉味甚甘冽與常水異館
去泉不出五里故得昕夕取泉以資茗菴余
讀書研道之暇時飲水自樂焉乃賦詩記事
真館何沉沉寥廓神明居陽庭肅宏敞丹林鬱扶疎
睠言茲遊息脫屣榮利區檐椽初日麗池臺涼雨餘
焚香破幽寂飲水聊舒徐潛心觀道妙諷咏古人書
懷澄神自適意愜理無遺誰云黃唐遠泊然天地初

迴首撫八荒紛攘蚍蜉如顛從逍遙遊何許崑崙墟

述懷

讀書衡茅下秋深黃葉多原上見遠山被褐起行歌
依依墟里間農叟荷篠過華林散清月寒水澹無波
遐哉棲遁情身外豈有它人生行樂耳富貴將如何

蛛絲網落花

落花綴蛛網蜀錦一規紅旣映綺疏外復照碧池中
含悽戀餘景散魄曳微風昔人問榮穢詎識本俱空
冬日窓上水影

日池浮湛澹霞牖上縈迴數腴三素雲照耀青蓮臺
高流輝自下含漪歛復開尸坐以默觀靜極自春回

雪泉為王光大賦

高齋面絕壁林密徑難尋風落松上雪零亂幽澗陰
皓潔映鶴氅清圓和瑤琴閒咏以自樂聊用忘華簪
丙子歲十月八日夜泊閭門將還溪上有懷友

仁陸徵君

明發辭吳會移舟夜淹泊空宇垂繁星微雲暝前郭
沉沉抱冲素悄悄傷離索歸掃松徑苔遲君踐幽約

至正四年十一月袁負外來林下為留兼旬臘
月十七日快雪初霽庭無來跡與僕靜坐因
取琴鼓之古音蕭寥如茂松之勁風春壑之
流水負外時年八十有二顏貌筋力未如四
五十許人為言甫弱冠遭逢盛明初宰當塗
過九華山道逢神人與棗食之後數數見夢
寐間若冥感玄遇者負外韜耀蘊真仕祿以
自給不為人所知豈郭恕先之流歟為賦五

言以贈

郎官調綠綺谷雪賞初晴兩忘絃與手流泉松吹聲
問言踰八十云嘗見河清掛帆望九華神人歛相迎
啖以海上棗歡愛若平生玄遇寧復得惜哉遺姓名

早春對雨寄懷張外史

林卧苦泥雨憂來不可絕掀帷望天際春風吹木末
飛蘿散成霧細草綠如髮念子獨高世南山修隱訣
取瑟和流泉操瓢酌明月神安形不凋跡高行自潔
思之不可見饑渴何由歇願為鸞鵠翔南遊拂松雪

懷常州學博強行之

君在西溪上年年楊柳春提壺坐柳下邀我見情真
青葉已垂帶白花還覆蘋別來今見柳思爾采芳芹

戊寅十二月丹丘柯博士過林下有賦次韻荅
之

積雪被長坂卧痾守中林山川雖云阻舟楫肯見尋
傾蓋何必舊相知亦已深驚風飄枯條清池冒重陰
聯翩雙黃鵠飛鳴綠水潯顧望思鬱紆徘徊發悲吟
願言齊羽翮金石固其心歡樂胡由替白髮期滿簪
已卯正月十八日與申屠彥德遊虎丘得客字

余適偶入城本是山中客舟經二王宅弔古覽陳迹
松陰始亭午嵐氣忽歛夕欲去仍徘徊題詩滿苔石

送友仁之京師

春風吹蘭旌佳人將遠遊遠遊何當還神京鬱雲浮
睠言英邁志飛轡不可留豈無金閨彥與子結綢繆
河山風氣雄江水日夜流遙瞻雲中雁庶以慰離憂

啄木

何處啄木鳥飛止于喬林微形亦以勞終日聞其音
所願木向茂不使蝨日侵吁嗟人之徒曾不如鳥心

江陰袁仲徵作軒名簣林日夕嘯咏其下至正

十二年二月廿四日訪余南蘭陵寓舍徵僕

賦詩遂走筆應請然不能盡道軒中清事也

風生簣簣谷雲迷渭水原蕭蕭春雨後翳翳清陰繁
憶昔文使君燒筭具盤飧彭城詩適至大笑飯為噴
風流成異代寂寞今誰論夫君暨陽隱字徵其姓袁
二仲接俸遊子猷時到門冠同薩縣製坐對宜城尊
翠羽共棲托鳳雛亦孤騫載誦偃竹記忽若聞清言
邈哉古人跡尚友不可諼

杜真人聽松軒

計籌白石頂聞有丹丘生和玉飲晨露寒林食絳英
止鶴眠松警螢火照書明為善得仙道脩然不近名
擬陰常侍一首寄劉祕監趙負外
幽弁游俠地都城百雉連河漢瞻疑近雲鳧信是仙
樓分霞欲曙花將月共妍攜毫傾藻思獻賦足為傳
還知跨烏鵲夜宿綵雲邊

玉壺中插瑞香水仙梅花戲咏

寒梅標素豔幽卉弄妍姿團團紫綺樹共耀青陽時

折英欲遺遠但恐傷華滋置之玉壺水芳馨消歇遲

秋夜賦

清漏下數刻踈鐘仍獨聞零露溥夕影端居澄俗氛
恬淡斯寡欲榮名非所欣樂矣咏王風忘年棲白雲

述懷

嗟余幼失怙教養自大兄勵志務為學守義思居貞
閉戶讀書史出門求友生放筆作詞賦覽時多論評
白眼視俗物清言屈時英貴富烏足道所思垂令名
大兄忽捐館母氏繼淪傾慟哭肺肝裂練祥寒暑并

卷二
二
釣耕奉生母公私日侵凌
黽勉二十載人事浩縱橫
輸租膏血盡役官憂病嬰
抑鬱事污俗紛攘心獨驚
罄折拜胥吏戴星候公庭
昔日春草暉今如雪中萌
寧不思引去緬焉起深情
寔恐貽親憂夫何遠道行
遺業忍即棄吞聲還力耕
非為螻蟻計興已浮滄溟
雲霾龍蛇噬不復辨涇涇
邈邈巖澗阿靈芝燁紫莖
有志而弗遂悲歌歲崢嶸
冶長在縲絏仲尼猶亟稱
嵇康肆宏放刑僇固其徵
被褐以懷玉天爵非外榮
賤辱行豈玷表暴從自矜
蘭生蕭艾中未嘗損芳馨

泊舟

泊舟嘉樹下開牖碧江潯
慨然念黃落景憇清陰
多暇觀魚鳥容與一登臨
蛻跡塵喧久欲寡天機深
寄王光大

春服始輕體嘉樹欲垂陰
夫樹結秀色江流涵碧深
晴絲正高下好鳥亦嚶吟
豈無伐木詩怡此風雩心
次韻酬友人

處世若過客踽踽行道孤
願友吉德士邈焉如鳳雛
人而無恒心未易為醫巫
往者不可作玉匣埋珠襦

卷二
枳棘何榛榛上有鳴臬呼維桐鸞棲止來匪應時需
卓犖千里馬壯氣塞九衢駑駘豈其偶齷齪當鹽車
龍可豢而致魚鮪固克厨未聞商山翁受廩稅以租
俗人難與言長吟野踟蹰青松在澗壑坐閱霜柳枯
所嗟鄭亂雅復惡紘奪朱至道安可言多金豈禎符
忽爲蹙躓者憔悴悲路隅簞瓢咏王風耿耿心勤劬
次韻姑蘇錢塘懷古
西子承吳寵餘踪見古臺空遺昔時月無復昔人來
臺邊越兵路幾見起兵埃

釀酒劍池水玉壺清若無揮盃送落月山鬼共歌呼
松間燈如漆白骨湯寒蕪

耕鑿古隧穿乃吳桓王墓金雁隨冷風黃腸畢呈露
物情異今昔以躑蹰緩歸步

仙人悲世換安景在清都寒暑自來往英雄生釣屠
錢塘江畔柳風雨夜啼烏

江山國破後弔古一經行輦路苔花碧御溝菰葉生
古跡今寧有新城江上橫

南山靈石澗翠壁掩松關張君已厭世乘螭遂不還

蘿磴餘幽躅今復誰躋攀

贈惟寅

隱几方熟睡故人來扣扉一笑無言說清坐澹忘機
衣上松蘿兩袖中南礪薇知尔山中來山中無是非
三十不娶妻四十不出仕道挫巖岫間翳名以自肆
何曾問理亂豈復陳美刺高懷如漢陰終老無機事

送惟寅

春江烟靄綠遠樹明清旭歸雁影斜斜鳴聲斷復續
陳君掛帆去似與雁相逐水際白雲度山中甘雨足

安得從耦耕柴門藝松菊去去且入城懷抱向誰傾
姚公有古道虛夷多遠情俾尔遂高隱狂歌樂幽貞

至正二十三年正月廿日余與諸友集於貞松

白雪軒其地林石竒勝窓牖明潔且主人好文尚古有文武材欵坐設肴醴相與嘯咏以
小謝雲中辨江樹分韻各賦得辨字

境靜塵慮清雨餘山光變池館闕虛閒琴酌申繾綣
蔚哉春木榮憇我飛翮倦石間有題字苔蝕已難辨

對春樹

端坐對春樹影落身上衣美人手所成紉縫願無違
步庭悲往躅瞻景惜餘暉芳襟沾露濕蘭珮委風微
凝思自的的染澤尚依依晨雞催夢短夜鵲逐魂飛
歡慶自茲畢憔悴損容輝

送致用游閩

韓衆禹穴來語我長生訣偶坐聽春雨雨止即言別
乃知茅君山貞居相往還山經許寄我依依師友間
貞居登真久識子十年後掣箱出遺文猶作蛟鼉吼
子去遊七閩漁浦桃花春白鷗飛送爾停橈採綠蘋

幔亭幾日到言笑邈無因憑將棹歌去歌向武夷君

送馬生

送子淮南行繫舟江岸柳翠影舞晴烟落我盃中酒
舉杯向落日春水浮天碧時見白鷗飛雪光翻綺席
應笑披羊裘歎釣江邊石

寄楊廉夫

吳松江水春汀洲多綠蘋彈琴吹鐵篴中有古衣巾
我欲載美酒長歌東問津漁舟狎鷗鳥花下訪秦人
寄李隱者

南汀新月色照見水中蘋便欲乘清影緣源訪隱淪
君住鈿山湖綠酒松花春夢披寒雪去疑是剡溪濱

寄韓介石

江上雨雲歇夕陽歌吹濛朱絃彈綠綺令我憶韓衆
魚戲弱藻下鳥飛明鏡中夢乘清浦月直過雪溪東

次韻呈張德常

陶公興寓酒杜老愁亦酌豪傑千載八處世何磊落
吐詞蔚忠義安貧務簡約嗟哉嚇腐鳶邈矣鳴臯鶴

朱火

朱火日方永涼風拂琴絲麋鹿遊臺苑燕雀悲火帷
蕩然京輔地無復漢官儀衆芳曰蕪穢陰凝方自茲

寄穹窿主者

山雲淡縱橫幽鳥跂上下寂寥非世欣自足怡靜者
平生卧遊趣屋壁何勞寫還期煮茯苓地爐同夜話
題原道西溪草堂

春水孤邨迥荆溪罨畫西晚日鳴榔起山雨竹雞啼
櫻桃花已落蘼蕪綠未齊酒船尋賀監蚤晚到幽棲
煮石山房

汲澗煮白石雲樓南磻隈敲石發新火荆薪藉餘灰
坐候升降理靜觀寒燠媒遂忘石鼎沸乍疑山雨來
丹成同此術鶴化詎能猜我亦食金液清淺笑蓬萊
出郭
我初來城郭新綠餘薔薇今我既出郭秋蓮落紅衣
郊居豈為是市隱勿云非去去將何從西山行路微
塵空夸毘海游潛四月餘賦歸亦無家塊處蝸牛廬
身世一逆旅成虧紛疾徐反已內自觀此心同太虛

聽錢文則彈琴

牛鳴野窳中雞登山木上黃鍾雜姑洗春容以清亮
別鵠暮鳴飛流水春演漾愛爾絃手忘令我形神暢
憶昔擅能事宋袁余所向錢君生獨後超軼絕塵鞅
操琴晚聞道月斧揮天匠杳如清廟瑟朱絃聽歎唱
古道久寂寥古音亦淪喪促軫淚沾纓歌詩重悲悵

贈王仲和

荒城夜風雨草木曉離披桂馥逗虛牖苔文滋硯池
弄翰聊寄逸永日以自怡且盡一日樂明朝非所知

訓張德機見贈

嘉藻枉我前令人意也消展咏當庭除清陰起涼颼
出何去巖穴隱何逃市朝仙師赤城霞旦旦存神標
贈張士行
雲門有逸客非仕亦非隱玉井千尺泉此士難汲引
結交雲林叟不顧俗嘲哂我拙唯任真子德常戒謹
相知既有素力學仰顏閔久別見容色英資固天稟
欲踈不能忘欲褻不可近

贈友生

春林積雨晴江渚烟波綠谷鳥語綿蠻澗泉聲斷續
蘿徑無來踪空山聞伐木時援清琴坐還同白雲宿
九日過彥行和韻二首

蕩舟烟景晚舉杯當素秋黃花忽在眼白髮乃滿頭
臨流發悲嘆援琴歌楚調罷席更淹留明月波間照
何事鹿皮翁逃名隱屠釣

九日喜初晴登高向何處山色見微茫波光淡容與
鼓枻逐輕鷗看雲覓新句適值無懷民相對澄神慮

對酒

題詩石壁上把酒長松間遠水白雲度晴天孤鶴還

虛亭映苔竹聊此息躋攀坐久日已夕春鳥聲關關
贈野處民

水聲轉屋西山翠浮屋東牀前苔滋雨門外松吟風
怡然無世慮心廣神為克曲肱以飲水至樂在其中
擊壤歌往古寧知事王公

靈鶴辭

陶公職仙署子良亦冥通所修揚許業存思在祝融
周卿宅丹元末胤仰仙宗神明接祈禱虛夷恒恪恭
飛霞煥玉檢流響徹金宮白鶴翔香烟僊僊載冷風

舞影綠雲上命侶青田中晨去瑤草春暮歸海塵濛
真靈忽降室羽車儼浮空步虛酌明水逶迤清夜終

陸德中祈雨有感

辟穀清虛久晨窓食絳霞濯神咸池水宴景丹元家
憂國悲民瘼旱郊起雷車枯魚出涸轍槁苗生稻花
我住清江渚種芹遶江沙忽乘蓮葉杯賤我仙掌茶
擬訪安期生為覓棗如瓜

卧病

早憂命觴掌抱疾忽經旬止酒卻腥腐端居謝喧塵

九
九
龕穢除內滯清虛以怡神江雲載飛雨飄飄灑衣巾
矯首詠玄虛精思候仙真道園遊恬淡心兵息狂狃
泠然風濤靜鼓柁銀河津戒哉貪饕子病原果何因

與全希言

卧病久不懌微瘳起行吟徑苔無來跡出門江水深
懷我平生友金蘭契同心欲共一尊酒道遠力不任
有客闖我戶晤言樂中林飄蕭綠髮仙亦見雪滿簪
取琴與子彈悠悠山水音能成伐木詩歌以慰所欽

酬友生

擁褐南軒下晨暉煖似春忽思王子晉醉着白綸巾
遊宴無冬夏清狂忘主賓能持麋鹿脯寄與不羈人
尋友人不遇

洲渚多落英沂流尋遠山輕舟載美酒搖蕩綠波間
俯詠拾瑤草遐思隘塵寰寅緣忽失遇悵望遂空還
次張仲舉韻

秧疇蒔已遍午饁休中林忽聞輶車至攬衣欣慨深
遂尋修竹下共憇西澗陰汲泉以煮茗遐哉遺世心

薛常州讓田詩

延陵古吳地泰伯有遺風仁讓自家國士民知孝忠
春暉草心碧日暮荆花紅為感使君政今時誰與同

潘公鳴臯軒

白鶴稟靈質翩翩有竒姿海月比高潔巖雲共逶迤
池上菖蒲花春烟紫綏綏飛鳴聊飲啄乘風來下之
我登鳴臯軒遂賦鳴臯詩安得赤玉笙鶴上吹參差
為張來儀賦匡山讀書處

廬山鬱岩堯上有香爐峰影落碧天外翠玉琢芙蓉
牽蘿讀書處雲磴無行踪猶遺石巖苔花開紫茸茸
愁心飛春雪寶劍沉雙龍應化蘇耽鶴歸棲千歲松
仙巖採芝叟父別倘相逢

金君伯祥名其先君墓左之室曰瞻雲軒蓋以
寓夫孝思油然而之義也若夫父祖之魂氣精
神其脗合感通之妙齋思則如見敬祭則來
格開牖而天光臨鑿池而泉脉動洋洋乎如
在其上如在其左右者雲豈足為喻哉於是
廣其義而為之賦詩

白雲起石上迅逸如迸泉汎演乎林莽飄飄乎山川

飛霞共聯絡凱風與周旋開軒滌遐想我思何緜緜
顧瞻忽在茲亦復停披馬卷舒無定理變刃徒縈纏
興念松下塵若承鶴上仙空花結浮翳百態交我前
戚欣從妄起心寐合自然當識太虛體勿隨形影遷

張鍊師祠醮感致瑞鶴賦贈

我識白雲君尚友赤松子仙署閔清巖社公隨役使
步虛禮初日飛神謁鈞天時有五白鶴翩翩遠香烟
手栽千樹桃風吹劫灰盡避世星壇西深竹聞清磬
倏來密霧集忽遂冷風還窻裏遺瑤瑟空中鏘珮環

題趙若巖龍山精舍

我生倦馳騫無機如漢陰重遊古蘭若對山開我襟
風流李謫仙賞靜諧夙心琅然哦新詩如聞大雅音
回首石林晚白雲花雨深

詠蓮

迴翔波間風的歷葉上露清池結素彩華月映微步
雲陰花房斂雨歇芳氣度欲去拾明璫踟躕惜遲暮

送陳惟允之金陵

雪消江水綠花發冶城春白下烏衣處輕舟去問津

指日望京國行歌非隱淪好及三釜養歸來以榮親

徐氏南園對雨

櫻桃花欲落風雨暮淒迷忽憶郊園日竹林通磻西
弱蔓滋野援蘭葉長芳畦念我當時友蒿萊沒舊蹊

春日有感

春岸生蘼蕪春風生蘭蕙夢見平生歡美人今何在
丹槁玄以白忽忽容鬢改年邁誰能復憂來誰與解

七月廿四日風雨寂寥與玄度集宗道南窓具
酒肴宴談遂以永日因賦

蕭條風雨秋沈寂窓牖晚故人山中來杯酒意勤懇
歛眉念乖闊握手話情悃千載鶴怨悲九時蓬萊尊
市脯良不易枯魚雜乾脰浮雲幾翻覆人事非余忖
得時寧足誇失勢焉用憤荆溪立壑多松水饒芝菌
結茅駕厓巔雲棲且安穩瑤草手堪摘何事鍾與畚
逐逐闌闌遊戚戚塵俗混張子邃古學林君業務本
達人解其會略近宜志遠鍾氏曷仇嵇司馬亦藉阮
鹿遊姑蘇臺鳥下長洲苑麻姑固狡獪蓬萊歎清淺
七袞吾已老一簣君宜勉後會未可期作詩陳繾綣

為方厓畫山就題

摩詰畫山時見山不見畫松雪自纏絡飛鳥亦閒暇
我初學揮染見物皆畫似郊行及城遊物物歸畫笥
為問方厓師孰假孰為真墨池挹涓滴寓我無邊春
校獵上林苑洗馬昆明池霜威肅笳鼓雲氣畫車旗
馬班陳賦咏衛霍綏蠻夷王風既未遠文明方在茲
逶迤霄漢上鳳皇尚來儀

為徐有常畫葉湖別墅

葉湖水淪漣松陵在其西望見吳門山波上翠眉低
白蘋晚風起寒烟遠樹齊水蕉籠華檻露柳罩金堤
居貞寧汲汲旅泊自棲棲屏處觀魚鳥風雨夜烏啼
題墨竹送顧克善府判之高郵

高郵古淮甸世產不乏賢顧君往佐郡才華當妙年
歌詩隱金石八音以相宣侈哉錦囊句雅甚朱絲絃
而此艱虞際撫事一愴然饑者易為食君能念顛連
何以贈子行墨君霜節堅

三月六日同李徵士遊禪悅僧舍禮上人出柯

博士所賦詩以示僕而博士君歿已二年展
誦為之悽斷因次其韻於後

佛生七佛後乃知青出藍寒月留孤光世人徒指談
嗟余墮狙網朝暮逐四三悲嘆明鏡塵何由息禪龕

題畫贈岳道士

義興岳道士野鶴如長身我知彌明徒不是侯喜倫
結喉吟肩聳鐵脊霜髯新手中石碁子頭上漉酒巾
父居離墨山自謂無懷民喪亂不經意松陵留十旬
香雲作輿衛長松為主賓既滋數畦菊復種二畝芹

樂哉以忘死道富寧憂貧為我具舟楫相期桃花春
題畫贈徐季明

梓樹陰當戶時聞好鳥鳴獨携一壺酒展席坐前楹
招邀白鶴侶吹弄紫鸞笙杳杳日景晚紛紛飛絮輕
風翻竹影亂明月已東生

龍門茶屋圖

龍門秋月影茶屋白雲泉不與世人賞瑤草自年年
上有天池水松風舞淪漣何當躡飛鳧去采池中蓮
畫贈呂志學

江雲昏絕巘汀樹猶斜陽獨立霜柳下渺然懷故鄉
歸來茅屋底篝燈寫微茫

畫竹贈志學

綠竹飽霜雪歲寒無荏容風至天然笑復愛夏陰濃
寒暑不能移德比柏與松豈若桃李榮春花但丰茸
畫竹寄友人

先春競桃李凌陽嘆蒲柳謝君靜者徒種竹安所守
亭亭清淨心鬱鬱霜雪後賦詩寄遠懷此君真可久

西老圖

弔古嘆流俗高人陳太丘開窓玩蘭雪邀我畫瀛洲
池上哦清詠林間聊遠遊悠然遂永日下榻更淹留

至正十二年三月八日冒風雨過九成荆溪舟

中劉德方郎官方舟烟渚畱宿談詩明日快
晴移舟綠水岸下相與嘯咏仰睇南山遙瞻
飛雲夾岸桃柳相厠如散綺霞掇芳芹而薦
潔瀉山瓢而樂志九成出片紙命畫眼前景
物紙惡筆凡固欲騁其逸思大乏騏驥康莊
也歐陽公每云筆硯精良人生一樂書畫同

理余亦云馬時舟中章鍊師岳隱者對奕吳
老生吹洞簫

故人郊掾史邀我宿溪船把酒風雨至論詩烟渚前
晨興就清盥思逸愛春天復遇武陵守共尋花滿川
黃本中書齋為寫寄傲窓圖

庭樹綠交蔭時鳥語清縣春竹羅徑筍夏花敷沼蓮
慨然三季後契彼義農前古井汲修綆空齋絙素絃
長歌歸去來悟悅陶公賢終尋桃花崦息景窮幽玄
送賢良北上

吳山朝靄外閭門春雨餘超忽孤帆遠天末浮雲舒
君今北闕遊我棲南山廬荷鋤事耕作閉戶咏詩書
高林鳴禽曙青苔行跡疎還期茅簷下一枉故人車

惻惻行

三月十五日陸玄素將從梁鴻山歸吳松之上
是夕坐至夜分始別余入舟賦此追至梁鴻
山寄之以定及冬重來之約

惻惻復惻惻憂思從中發感子遠來訪畏子遽言別
不有同心人何以慰孤寂矧茲春夏交蕭艾盈路側

江水亦浩漾風帆還飄突行將阻携手轉覺意忽忽
交好匪在今高誼敦自昔人生寧無別所悲歲時易
坐嘆辛夷紫還傷蕙草碧僕夫竊相告怪我悲憤塞
山中梁鴻棲江上陸機宅井臼今蕪穢鶴唳亦寂寞
余往經其墟徘徊但陳迹天地真旅舍身世等行客
沉沉何所損皎皎奚自益修短諒同歸數面聊歡懌

寄張外史

神鸞戲玄圃巨鱗偃演渤爾亦碧巖中遁形修隱訣
燒香庭竹淨洗研池苔滑撫弄無絃琴招邀青天月

跡高行亦苦冰蘖忌芳潔何當往相尋拂石栢松雪
次韻別鄭明德

思君阻言笑三歲同一日既見令人怒不見令人憶
揮觴縱譎浪抗論殫今昔世方雜涇渭已乃忘得失
饒涎飫甘美醉眼亂朱碧少逢人眼青每遇俗眼白
不隨世混混自喜心得得講學日光輝盡性又循率
不意吳市門尚復有此客茅齋素壁上佳句手自摘
楓林已搖落梅蕊尚未折吁嗟歲云暮感歎終日夕
殘生能幾面念此氣填臆富貴真可羞功名竟何物

世事蠶登斷危機猩着屐翁乎善自守氣體保寧逸
去去勿重陳且復混玉石

贈張以中

吾友張以中少年如老翁因過修竹裏邀我碧巖東
琥珀松醪醞玻璃茗碗紅子端今已矣千載事同風
安居已度夏卧病乃經秋朝菌悲影短風萍歎波浮
寸田勤自治德宅可歸休慎勿與時競心境似虛舟

贈陸有恒

學行美德業孝弟為本根朝益以暮習夏清而冬溫
無逸勤稼穡幹蠱持戶門勿為習俗流必念古義敦
謹身尚節儉從善報蘭蓀堯舜雖有子朱均乃淫昏
瞽鯀何頑凶子也大聖尊蓮固生污泥木可為犧尊
簡編蟲蟬出各有至理存惟人異禽獸暴棄湮其源
惟學必由本根深見枝蕃于何繡鞶悅外飾奚足論
安宅正路間爾居行爾轅斯道邇且易至樂不可諉

次韻張伯琦

長嘆悲人寰彈琴想天際夏殷禮相因孰謂周可繼

大道久榛蕪高才日凌替遺書歎不泯授受豈有二
鄒孟道性善宅路喻仁義後生事言說慨彼涕沾袂
允矣二三子仰鑽互立志松柏受命獨歲寒鬱蒼翠
誰歟無媿怍夙駕尋吾契

贈友

父子相師及周南義理門阿翁如玉潔賢嗣似春溫
舍後自生笋堂陰亦樹萱西山近在望靜默以忘言
吾及陸友仁甫舊得古銅印一紐以示余辨之
文曰陸定之印以名其子而字之曰仲安及

仁既沒仲安求為賦焉

吾友伯仁甫覽古閔世盲示我古印章始得自幽并
辨文曰定之釋義為爾名既名字仲安勗哉在敬誠
仁甫今則亡緬懷涕沾纓繫昔黃太史結交漢米生
手持玉刺文螭鈕交縱橫上有元暉字印利與弗輕
殷勤字其兒祖武冀可繩久矣學業懋繼述暉芳英
書畫比二王價重十連城高躅思仰止景行爾其行

韓伯休

韓康抱淵靜匿影以逃名亦有梁伯鸞五噫出漢京

諒哉古賢達道與人俱貞不以身殉物物固莫之撓
胡為貴目前狗苟且蠅營粗計一時得不禍害乃生
爾其繩祖武景行尚勉行

畧上人松月軒

虛牖宿閒雲長松掛明月道人初定起淨境無炎熱
手持青鸞帚衣掃石上雪冷然滌心塵寂照光不滅
和拙逸先生閒居韻

芻豢非所悅甘我藜藿味無辱奚必榮知足方可慰
客行值炎天嘉木予來堅禁汝忿慾心養此浩然氣

見義思必為奮若泉感沸學焉苟無成斯亦不足畏
道翁先生取予棄筆戲成五言因次韻

生與硯為鄰惟知楮穎珍饑鳶雜吟嘯那用憂空困
天矯鍾王跡道媚骨肉勻澄懷靜臨寫時時見天真
遜學辭親秋暑將事于役因寫幽磴寒松圖并
詩以遺之亦若招隱之意云耳

秋暑多病暘征夫怨行路瑟瑟幽澗松清陰滿庭戶
風聲雜湍激古音奏韶護張幄儼停雲垂帷粲繁露
諒哉如金玉周子美無度息景毋狂馳笑言以胥晤

拙逸先生賦古意見招次韻奉荅

楚狂昔悲歌鳳兮何德衰行邁心搖搖薺青麥離離
雨雲嘆輕薄交道傷唵噉鴻鵠志自遠燕雀棲其卑
風吹枳棘藂月照琅玕枝姦慝與賢智邪正亦易推
忠本由恕立義豈為利移瞳子分瞭眊履蹈知醇疵
折柳以樊圃狂夫尚睢睢不以禮自防言動輕乖宜
友馬不以道異端固紛披君看枯魚泣魴鯉慎所之

宿王耕雲山居

城市厭煩燠江山玩清遠盥濯臨石湖吟嘯望雲巖

范公游集地登陟塵情遣悽悽靡遺構鬱鬱猶荒苑
仙人王子晉抱道雲舒卷鳳吹翔河汾鶴巢來棲偃
涼風縱逸棹溪水清浣浣何當采靈芝忘年從嵇阮

吳淞山色圖

吳淞春水綠搖蕩半江雲嵐翠窓前落松聲渚際聞
潘郎狂嗜古容我醉書裙鼓柁他年去相從遠俗氛

題畫

惟寅友兄雅志林壑遠寄佳紙命僕寫圖賦詩
因作此以寄歲己亥五月八日

卷二
齋居誰為友毛穎與陶泓有客附書至云是楮先生
潔白中含素柔滑表至精愛此風林意更起丘壑情
寫圖以間詠不在象與聲

題吳仲圭畫次韻并跋

元初真士嘗居嘉禾紫虛觀好與吳仲圭隱君
遊故得其詩畫為多今年十月予始識之初
即出示此幀命僕賦詩因走筆次吳隱君詩
韻題于上隱君自號梅花道人云

鴛湖在嘉禾湖水春浩蕩家住梅花村夢逸白雲鄉

染翰自清逸歌詩更悠長緬彼圖中人看君杖枕榔
畫竹

至正己巳五月三日過開元精舍希遠首座為
設湯餅煮茗焚香相餉明日將還穹窿寺因
寫竹枝賦詩贈別

僧夏已安居還山寺在郭初心了玄解自不為律縛
渡水獨浮杯采苓時負鑿余亦漫浪人枵然慚濩落
余自與庸叔別後不相見近十載矣今年冬邂
逅吳下班荆道舊殆若隔世因寫霜林遠岫

圖并賦詩以贈

賀公雅吳語嘗誦少陵詩遠孫有古風隱居淮水湄
開牖望青山尋真歌紫芝鏡湖似清淮烟濤春渺瀰
何當棹酒艇與爾相娛嬉永言以鼓瑟獻酬斟酌之
伊昔龍眠莊山水含清暉松桂蔚佳色田疇足耘耔
結茆飯松朮忘年樂熙熙贈此以為好同心勿乖違

寄叔方

乖阻方徂秋忽然已改年樓前櫻桃花開落春風顛
米船到家日雨砌溜涓涓綠酒仍滿眼素琴久無絃

呼我共斟酌歡劇更惘然處窮則已固言達誰當先
俯仰嘆鳶魚浮沉各天淵慎勿傷本性木雕而土埏
鸞翔安可挽青雲氣翩翩猶羨羲皇人清風北窓眠
寄良夫契友

昔者安豐董朝耕暮讀書親樂以妻順山樵而水漁
徐子慕古義林卧獨端居彈琴咏王風窅然觀化初
月窓淡踈竹跣趺當久如

答徐良夫

八月七日偕耕雲叟訪耕漁隱者風雨寂寥中

為留三日日有圖書筆硯之樂九日耕隱賦

詩見贈次韻奉荅

雲卧雨聲集庭樹颯以秋身同孤飛鶴心若不繫舟
燕俎登松菌匏尊斟澗流蘭芳日凋悴吾生行歸休
不作螻蟻夢遊神鳳麟洲青山澹相對白髮忽滿頭
仙去雲冉冉風鳴竹修修諒哉伐木詩鳥嚶尚相求
居吳二十載未及茲山遊君才如鮑謝搞辭亦云優
歡然敬愛客能不為爾留桑土夙所徹戶牖何綢繆
地無車馬塵路轉巖穴幽既晴引飛屩回望林間樓

廿二日贈別耕雲

王君瑚璉器清鑒涵水鏡忍窮如鍊石居易安義命
鳳兮出非時不與凡鳥並勤勞世勲胄忠孝本天性
白圭絕微瑕朱絃駭羣聽任直唯疾讒亂雅猶惡鄭
悄悄慍迫隘咄咄恥奔競西壠松桂林白雲森相映
巖僧同棲止林叟奮嘯咏於時無美刺托物善比興
藹然顏淵樂陋彼原憲病瑗乎知非久慧也安心竟
怡性壽而康克戰道斯勝蕙草秋更綠松聲寒愈勁
何當戲玄洲相期適遐廻

廿三日聞耕雲至北村將來此

自予來南邨忽忽數日矣犬豕混人目烏鳶聒人耳
不見佳友生如逃空谷底足音聞楚然云胡而不喜
曹君達卿婁江西渚隱君子也自號古民息景
燕處以禮義悅心亦不求知於人今年七十
三而耳目聰明體力強健有三男子皆能愉
婉其容色以為養又信而智古之樂以悅生
優游以佚老者吾昔聞而今見之矣耕學叟
命為之詩

隱處婁江渚逍遙古逸民苔石作牀坐青山為主賓
商巖黃綺輩北牖羲皇人漁郎問津去源上桃花春

遠廬詩并序

遠廬子蔡質子賢也

有逸人居長洲東荒寒寂寞之濱結茅以偃息
其中名之曰遠廬且曰人世等過客天地一
遠廬耳吾觀昔之富貴利達者其綺衣玉食
朱戶翠箔轉瞬化為荒烟蕩為冷風其骨未
寒其子若孫已號寒啼饑於塗矣生死窮達
之境利衰毀譽之場自其拘者觀之盖有不

勝悲者自其達者觀之殆不直一笑也何則
此身亦非吾之所有况身外事哉莊周氏之
達生死齊物我是遊乎物之外者豈以一芥
蒂於胷中莊周我所師也寧為喜晝悲夜貪
榮無衰哉予嘗友其人而今聞其言如此盖
可嘉也庚戌歲冬予凡一宿蘧廬賦贈

天地一蘧廬生死猶旦暮奈何世中人逐逐不返顧
此身非我有易晞等朝露世短謀則長嗟哉勞調度
彼云財斯聚我以道為富坐知天下曠視我不出戶

榮公且行歌帶索何必惡

癸丑八月訪耕雲高士於西巖因寫耕雲軒圖
又為之詩

芝田耒耜間石廩山雲滿渚際荷衣翻巖前蘿帶緩
垂露藹輕帷芳池沃清盥霞食非腥腐物化自修短
空困未足憂服食滋楨幹



五百四十三

清閣閣遺稿

函 8 册 書号 65574

九二

三十一

